

禮記正義殘本
儀禮疏

全一



禮記正義卷三

曲禮上

嘉業堂叢書

上言在者案論語云足則吾能徵之矣是言

徵也某在斯是言在也案異義公羊說譏二名謂二字
作名若魏万多也左氏說二名者若楚公子棄疾弑其
君卽位之後改名熊居是爲二名許慎謹案云文武時
賢臣有散宜生蘇忿生則公羊之說非從左氏義也
逮事父母則諱王父母正義曰逮及也王父母謂
祖父母也若及事父母則諱祖也何以然孝子聞名心
瞿祖是父之所諱則子不敢言旣已經不言父母亡而
已言便心瞿憶夕故諱之也不逮事父母則不諱王父
母者若幼少孤不及識父母便得言之故不諱祖父母

也庾云謂王父母之恩正應由父所以連言母者婦事舅姑同事父母且配夫爲體諱敬不殊故幼無父而識母者則可以諱王父母也

注此謂庶人至諱祖

正義曰適士以上廟事祖者

祭法云適士二廟祖之與禰各爲一廟其中士下士亦廟事祖但祖禰共廟則士喪祀一廟是也熊氏云此適士者包中士下士對庶人府史亦稱適也

大夫之所有公諱

正義曰今謂人於大夫之所正

得避公家之諱不得避大夫之諱所以然者尊君諱也若兼爲大夫諱則君諱不尊也不言士之所諱者士卑人不爲之諱故也或可大夫所有公諱者君及大夫諱耳

亦無已之私諱玉藻云大夫之所有公諱無私諱但此文上承君所無私諱之下惟云大夫之所有公諱故略之不云無私諱耳○詩書不諱臨文不諱者何盾云詩書謂教學時也臨文謂禮執文行事時也案論語云詩書執禮是教學惟詩書有誦禮則不誦惟臨文行事若有所諱則並失事正故不諱也○廟中不諱者謂有事於高祖廟祝嘏辭說不爲曾以下諱也爲尊無二上也於下則諱上也若有事於父則諱祖已上也○夫人之諱雖質君之前臣不諱也者夫人君之妻質對也夫人本家所諱也臣於夫人之家恩遠故也○婦諱不出門者門謂婦宮門婦家之諱謂於婦宮中不言耳若於宮

外則不爲諱也。故臣對君前不諱也。注婦親遠於宮中言避之。陳鏗問曰：雜記母之諱，宮中諱妻之諱，不舉於其側，此則與母諱同何也？田瓊答曰：雜記方分尊卑，故詳言之，曲禮據不出門，大略言之耳。母諱遠妻諱近，則亦宜言也，但所避者狹耳。

大功小功不諱

正義曰：古者期親則爲諱也。陳鏗

問曰：亦爲父乎？自己親乎？田瓊答曰：雜記云：卒哭而諱。王父母兄弟世父。母叔父母。姑姊妹子與父同諱。是父所諱齊衰親也。然則大功小功不諱矣。熊氏云：大功亦諱小功不諱。若小功與父同諱，則亦諱之。知者雜記云：王父母兄弟世叔父母。姑姊妹子與父同諱。是父之世

叔父母及姑姊妹已下皆爲之小功父爲諱故已從父爲之諱也○入境而問禁者此下並爲敬主人也境界首也禁謂國中政教所忌也既至境界當先訪問主國何所禁也○入國而問俗者國城中城中卽如今國門內也俗謂常所行也入主人之城內亦先問風俗常所行也○入門而問諱者門主人之門也諱主人祖先君名宜先知之欲爲避之也問諱而以門爲限者主人出至大門外迎客客入門方應交接故於門爲限也故注云皆爲敬主人也

外事以剛日至踐之 正義曰此一節明卜筮及用日之法各隨文解之○外事以剛日者外事郊外之事

也剛奇日也卜曰有五奇五偶甲丙戊庚壬之奇爲剛也外是剛義故用剛日也

注順其出爲陽至甲午祠兵

正義曰以出在郊外

故順用剛日也公羊莊公八年正月師次于郎以待陳人蔡人甲午祠兵傳云祠兵者何出曰祠兵何休云禮不徒使故將出兵必祠兵於近郊此鄭所引直取甲午證用剛日事耳其祠之文鄭所不用故異義公羊說以爲甲午祠兵左氏說甲午治兵鄭駁之云公羊字誤也以治爲祠因爲作說引周禮四時田獵治兵振旅之法是從左氏之說不用公羊

內事以柔日

正義曰事郊內之事也乙丁己辛癸

五偶爲柔也。然則郊天是國外事，應用剛而郊特牲云郊用辛，非剛也。又社稷是郊內應用柔而郊特牲云祭社日用甲，非柔也。所以然者，郊社尊不敢同外內之義故也。此言外剛內柔，自謂郊社之外他禮則皆隨內外而用之。崔靈恩云：外事指用兵之事，內事指宗廟之祭者，以郊用辛，社用甲，非順其居外內爲剛柔故也。祭社用甲，所以召誥用戊者，召誥是告祭，非常禮也。郊之用辛者，唯謂夏正郊天及雩大亨明堂耳。圜丘自用冬至日五時迎氣，各用其初朔之日，不皆用辛。○凡卜筮日者，古先聖王所以立卜筮者，下云使民所以信時日敬鬼神，決嫌疑，定猶豫。卜筮必用龜蓍者，案劉向云：蓍之

言耆龜之言久龜千歲而靈蓍百年而神以其長久故
能辨吉凶也說文云蓍蒿屬也生千歲三百莖易以爲
數天子九尺諸侯七尺大夫五尺士三尺陸機草木疏
云似藎蕭青色科生洪範五行傳曰蓍生百年一本生
百莖論衡云七十年生一莖七百年十莖神靈之物故
生遲也史記曰滿百莖者其下必有神龜守之其上常
有雲氣覆之淮南子云上有蓂蓍下有伏龜卜筮實問
於神龜蓍能傳神命以告人故金縢告大王王季文王
云爾之許我乃卜三龜一襲告是能傳神命也又鄭注
天府云卜筮實問於神龜筮能出其卦兆之占耳案白
虎通稱禮三正記曰天子龜一尺二寸諸侯一尺大夫

八寸士六寸龜陰也故其數偶其筮案少牢大夫立筮鄭云大夫著長五尺推此而言天子九尺諸侯七尺士三尺也著陽也故其數奇所以謂之卜筮者師說云卜覆也以覆審吉凶筮決也以決定其惑劉氏以爲卜赴也赴來者之心筮問也問筮者之事赴問互言也案繫辭云定天下之吉凶成天下之亹亹莫大于著龜又云著之德圓而神卦之德方以知神以知來智以藏往又說卦云昔者聖人幽贊于神明而生著據此諸文則著龜知靈相似無長短也所以僖公四年左傳云筮短龜長不如從長者時晉獻公卜取麗姬不吉更欲筮之故史蘇欲止公之意託云筮短龜長耳其實無優劣也若

杜預鄭玄因筮短龜長之言以爲實有長短故杜預注傳云物生而有象象而後滋滋而後有數龜象筮數故象長或短是也象所以長者以物初生則有象去初既近且包羅萬形故爲長數短者數是終末去初既遠推尋事數始能求象故爲短也又鄭康成注占人云占人亦占筮言掌占龜者筮短龜長主於長者是鄭及杜預皆以爲龜長筮短也凡卜筮天子諸侯若大事則卜筮並用皆先筮後卜故筮人云凡國之大事先筮而後卜鄭注云先筮後卜卽事之漸大事者則太卜云國大貞卜立君卜大封大祭祀凡出軍旅喪事及龜之八命一曰征二曰象三曰與四曰謀五曰果六曰至七曰雨八

曰瘳此等皆爲大事故鄭注占人云將卜八事先以筮筮之是也若次事則准用卜不筮也故表記云天子無筮鄭注云征伐出師若巡狩天子至尊大事必用卜也是天子出行唯卜無筮是也小事則無卜唯筮故筮人掌九筮之名一曰筮更謂遷都邑也二曰筮咸咸猶僉也謂眾心歡不也三曰筮式謂制作法式也四曰筮目謂事眾筮其要所當也五曰筮易謂民眾不說筮所改易也六曰筮比謂與民和比也七曰筮祠謂筮牲與日也八曰筮參謂筮御與右也九曰筮環謂筮可致師不鄭注占人不卜而徒筮者則用九筮是也天子旣爾諸侯亦然故春秋僖二十五年晉卜納襄王得黃帝戰於

阪泉之兆又筮之得大有之睽哀九年晉卜伐宋亦卜而後筮是小事卜筮並用也但春秋亂世皆先卜後筮不能如禮其禮既先筮後卜尚書先云龜從者以尊卑言之故先言龜也鄭注周禮云筮凶則止不卜所以洪範有筮逆龜從者崔靈恩云凡卜筮天子皆用三代著龜若三筮並凶則止而不卜鄭云若一吉一凶雖筮逆猶得卜之也則洪範所云者是也其大夫則大事卜小事筮大事則葬地及葬日爲事之大則卜故雜記云大夫卜宅與葬日是也其小事用筮則少牢常祀筮日是也士亦大事卜小事筮故士喪禮卜葬日以喪葬爲重須定吉凶故用卜也其尋常吉祭比葬爲輕故筮日也

葬既卜日得吉餘事皆吉可知故唯筮葬地不復用卜也

旬之外曰遠某日者正義曰案少牢大夫禮今月下旬筮來月上旬是旬之外日也主人告筮者云欲用遠某日故少牢云日用丁巳筮旬有一日吉乃官戒既云旬有一日是旬外一日此謂大夫禮

旬之內曰近某日者

正義曰案特牲士禮云不諏

日注云士賤職褻時至事暇可以祭則筮其日不如少牢大夫先與有司於廟門諏丁巳之日是士於旬初卽筮旬內之日是旬之內日也主人告筮者云用近某日此據大夫士故有旬內旬外之日也若天子諸侯其有

雜祭或用旬內或用旬外其辭皆與此同案少牢特牲其辭皆云來日丁亥不云遠某日近某日者彼文不具也

喪事先遠日者

正義曰喪事謂葬與二祥祥是奪

哀之義非孝子之所欲但制不獲已故卜先從遠日而起示不宜急微申孝心也故宣八年左傳云禮卜葬先遠日辟不懷杜注懷思也避不思親也此尊卑俱然雖士亦應今月下旬先卜來月下旬不吉卜中旬不吉卜上旬吉事先近日者吉謂祭祀冠娶之屬故少牢云若不吉則及遠日又筮日如初是先近日也

曰爲日至有常

正義曰命龜筮辭也卜擇吉日故

曰爲近日○假爾泰龜有常假爾泰筮有常者假因也
爾汝也爾謂指著龜也泰大中之大也欲褒美此龜筮
故謂爲泰龜泰筮也有常者言汝泰龜泰筮決判吉凶
分明有常也故云假爾泰龜泰筮有常凡卜筮大夫已
上命龜有三命筮有二其一爲事命龜是蒞卜之官以
主人卜事命卜史是一也二卜史旣得所卜之命更序
述蒞卜所陳之辭名曰述命二也卜人卽席西而命龜
云假爾泰龜有常三也命筮二者一爲事命筮則主人
以所爲之事命筮史是一也二則筮史得主人之命遂
述之云爲述命是也士則命龜有二命筮有一知士命
筮有一者士喪禮云命筮人哀子某爲其父筮宅筮人

許諾不述命注云不述者士禮略是士命筮一也知士命龜二者士喪禮蒞卜命曰哀子某卜葬其父無有近悔許諾不述命乃云卽席西面命龜旣云不述命是士命龜二也知大夫命筮二者以士云命筮不述命則知大夫已上述命也故少牢云人曰孝孫某來日丁亥用薦歲事於皇祖伯某又云史遂述命曰假爾泰筮有常孝孫某來日丁亥云是大夫命筮二但冠卽席所命於述命之上也知大夫命龜三者以士喪禮蒞卜爲事命龜又有卽席西面命龜云不述命明大夫述命故知大夫命龜三也

注大事卜小事筮

正義曰此大事者謂小事之中